



Foto: Frans Bannus

## 'Geert Teis' vol volk bie 't priesen oetlangen Dialectwedstried lopt as 'n liere

■ **KNOAL** – „Ast t zo gaait as op t Knoal, huif ik ais nait te komen”. Zo luit Siemon Reker zeggen, dat e spiedelk genog nait bie t oetlangen van priesen in dialectwedstried wezen kon. Nou het ons streektoalfunctio-noares t al drok genog mit zien aanpittje-waark deur d' haile pervinzie hin. Boetendes lopt t op t Knoal ook zunder hom ja as n liere.

Door **Johan Poppen**

Veureg jaar zat roadzoal tot de kop tou vol. Nou was grootste zoal van Geert Teis sikkom te klaain om ale kinder, onderwiezers en òllu baargen te kinnen. „t Grunnens leeft!” mainde Piep de Roo, dij de boudel aannander pruit. Om eerste winnoars veur aal dat volk nait te slim in de zenen te joagen, wuiren heur stòkjes veurlezen deur Greetje Ronde en Ebbert Muntengoa.

Greetje dee mit Bennie Klein n poar schetsjes oet d' olle deuze, meziekmoaker Eltje Dod-demoa haar teksten bienander flansd om te zingen, de maiste deur kinder van Neuteboom-

schoule. Over vrouger: 'de bodem was nog nait bedurven, der was ook nog nait zoveul sturven'; over Janman, dij ainzoam is; over opa, dij t vrouger ook mooier von; over n Grunneger tv-zender, dij vinden wie mor nait. En dat dut ons veul verdrait.

Kinder hebben t traauwens al stoer genog om n Grunneger radioprogrammoa te vinden, dat heur ieder weke in hoes holden kin. Doar mout ook mor ais wat aan doan worden. Mor meschain hebben Reker en zien lu van Toal dat al wel hoog op heur verlanglieske stoan. Op t Knoal zellen ze nou al wel aan t prakkezaaiern sloagen, hou ze aankom joar n spesioal kinderoavendje van pries oetlangen roaken kinnen. Den hebben ze ook meer tied van veurberaaiden. Want leuf mor, dat dizze touloop veur heur n grode verazzen west het!

Veur verschaaiden lu in de vòrm van n pries. Zo binnen ze valen: in de òfdailen 8-12 joar (111 inzenden): 1. Elly Speelman (11), Alteveer: gedicht 'Miljeuvervoeln'; 2. Jarno Duursma (11), Knoal: verhaal 'Torenklokke';

3. Sibrand Drijver (12), Muzzelknoal: verhaal 'Scheuvellopen'; eervolle vermeldens: Ramona van der Kaap (9), Alteveer: verhaal 'Mien schoun'; Jan Wever (12), Muzzel: verhaal 'Vissen'. Apaarte pries veur t bere-projekt: groep 1 en 2 o.b.s. Westerschool, Knoal.

In òfdailen van 13-18 joar wazzen mor 26 inzenden. Twij priesen binnen doarom genog, zee de jury. „As dat gain Grunnegers binnen...” laagde börgmeester Brink. Hai langde priesen oet aan: 1. Bianca van der Aa (14), Muzzelknoal: gedicht 'Stromende piebestelen'; 2. Jeroen Duursma (13), Knoal: gedicht 'Onze kadde'. Òfdailen 18-plus (63 inzenden): 1. Martin Holman (Muzzelknoal): verhaal 'n Tjiftjaffen huusholtje'; 2. J. van Dijk (Knoal): verhaal 'Wat n gedounte om niks'; 3. D. Dekker (Muzzelknoal): verhaal 'Schoonollen'; eervolle vermelden: Alb. Michels (Onstwedde): Westerswolds gedicht 'Hannen'. En kiek vandoage ook op bladzie-de 'Streektoal'.

WC 30.3.'88

▲ Om winnoars van priesen nait in de zenen te joagen veur aal dat volk, wuiren heur inzenden veurlezen. Greetje Ronde dut dat hier mit t riem 'Miljeuvervoeln' van Elly Speelman, dij zokzulm Speelman nuimde. Dij schoamt zok teminnet hailendal nait veur t Grunnens proa-ten!